

TAPAK 7

Julia Roberts nem World's Most Beautiful Woman nungja agütsü



TAPAK 9

Queen Elizabeth II asoba anogo tanü lir

VOL. XIV NO. 181 (ADOK 181)

DIMAPUR

FRIDAY

APRIL 21, 2017

5.00

Ketdangsertemji terenlok tongshitem lir: Angh

Kohima, April 20 (TYO): National Civil Servants Day anogomung nung sorkar ketdangsertem nem tenüsang agütsüdag Nagaland aser Arunachal Pradesh Angh, P.B. Acharya-i sorkar ketdangsertemji peipei tentet aser departments nung temelenshi adokdaksür kaka asütsüla, ta metetdaksü.

Angh-i, nüburtem tenzüksü atema sorkar ketdangsertem asüngsashitsü aser pei mapa mejetmejeta inyaksü asoshi kümshia April 21 nü "Civil Services Day" amungtsü atema India sorkari telemtetba agiogo, ta metetdaksü.

Terenlok atema ketdangsuba maparen nung mapa kanga junga

inyaksü asoshi mapang tongogo, ta paisa ashi.

Paisa sorkar ketdangsertem dang, "Nenok ya mapa inyaker ka dang masü saka nüburtem tenzüksü mapa nung nija aser telok sasep nung longjemer inyakerterem lir. Nüburtemi parnok teblemstü onüktem atema ketdangsertem dak rangloker," ta ashi.

Angh-isa, ketdangsertemji terenlok atema tongshitem lir aser sorkar indang tongtoret lir, ta ashiba den külemi nübur tsüngda mebendangi pei mapa nendaka inyaksü ayongzük.

Acharya-isa, ketdangsertemji linük temzüng nung aliba ama inyaksüla, ta ashi.

Human Resource development nung rangloksüla: CM



April 20, 2017 nü Kohima Campus, RCEMPA Jotsoma nung Chief Minister, Dr. Shürhozelie Liezietsu 15buba Nagaland University Students Union Literary Day nung adentsü aruba noksa nung angur.

Kohima, April 20 (TYO): Nagaland Chief Minister, Dr. Shürhozelie Liezietsu-i, lenla aika nung terenlok nungdaka lir, ajüsüka Naga nung atema tongtibatibaji Human Resource Development nung rangloker inyaksüla, ta ashi.

Tanep Kohima Campus, RCEMPA Jotsoma nung 15buba Nagaland University Students Union Annual Literary Day sentong nung tongti tesendanger o jembidang Chief Minister-i, Naga nung renloksü atema nungdakji human resource development lir, ta ashi.

Shisaliok nung terenlok dak sentakba nung pai, shisaliok agütsüdag tekalan mapatema kar sayutsüla, koba ajanga kaketshirtemi mapa atema sorkar dak dang menendaki sen aazüka parnok tebok mesüa litettsü, ta ashi.

Shisaliok tajung ngua tejakleni otettsü asoshi kaketshirtem,

tsüraburtem, tesayurtem aser nüburtem longjemer amalitepa inyaksüla, ta ayongzüka Chief Minister-i, "Shisaliok tapet angubaji senti lir aser lokti atema tajangzük asütsü. Asenoki shisaliok mapatong mebenokra aser kaketshirtemi timi manitetra kaketshirtemji asen lokti atema khuret ka akumtsü," ta ashi.

Dr. Shürhozelie-isa kaketshirtem dang, sorkar mapa angutsü atema dangbo degrees marishitsüla, kechiyong sorkar mapa nung tatembang ka tongogo, ta ashi.

Chief Minister-isa, Nagaland nung contract aser work-charge densema sorkar mapa nung nisung lakh 1.40 shi lir, ta metetdaksü.

"Asen kaketshirtem nem shisaliok tajung aser job-oriented shisaliok agütsütsü atema shisaliok inyakyim nung asalentong tejangja alitsü

nungdak," ta paisa ashi.

"Nüburtem nungdak peritsütsü atema taoba mapang nungbo sorkari school aser collge aika lapoka liasü, ajüsüka tango sorkari kaketshirtem nem shisaliok tajung agütsütsü atema taliba rangloker inyaker," ta paisa shisem.

Kasa sentong nung tetushi tejaoker, Pro Vice Chancellor i/c NU Kohima Campus, Prof. Buno Liegise-i, shingai merenloki meliner saka taküm nung nükjidong tongner aser tejakleni oner, ta ashi.

Iba dak sentakba nung lai, "Iba nükjidongji ataloktsü atema asenoki zübazülema mesüra melung sür malitsüla, saka kanga süoki ia shisadangtsü nungdak, iba den külemi asen tajungtiba agi meranga inyaksüla," ta ayongzük.

Laisa, 2017 küm atema University nung admission ji online ajanga dang agitsü, ta metetdaksü.

Athong Makury-i Nagaland Angh ajuru

Dimapur, April 20 (TYO): Tanü Myanmar nungi Naga nung shisashir aser Council for Naga Affairs Tir, Athong Makury-i Raj Bhavan nung Nagaland Angh, P B Acharya ajurua liasü, aser iba mapang nung Athong-i, International arrtsülen aliba nüburtem atema mapa tajung balala inyakra atema India sorkar dang pelaba lemsatop.

Paisa Angh dang, arrtsülen aliba nüburtem tajangzük atema gari lenmang tesendaktep, Schools/Colleges aser Hospital

tem terenlok atema yaridaksünar, ta mepishi.

Athong-isa Angh dang, Meluri sub-division kübok Avankhu ajanga shishilembaba lenmang nung terenlok nungdaker, koba ajanga Nagaland aser Myanmar tsüngda alir Naga nung ajangzüksü, ta metetdaksü.

Ano Angh-ia, arrtsülen alirtem tajangzük angutsü atema Public Private Partnership (PPP) kübok Hospital aser School tem amenoktsü atema pai mera agia inyakra metetdaksü.

Thanwalo küm 10 tepoukdak ayutsü

Kohima, April 20 (TYO): 2015 küm Thanwalo Magh-i arishi küm 61 amitsür ka tashiyim amshia taküm raksatsüba tatalokba sülen küm ka ser tesadang shi lir tatema district session court-i iba ken o nung pa aija küm 10 tepoukdak ayutsü obendang agütsüba den külemi senchi 10,000 chiogo.

Tanü nikongdang state sorkar tenüng nung Public Prosecutor (PP), Kathu Rengma-i pa indang office chamber, Kohima nung osangbenertem den jembia liasü.

Pai ashiba agi, principal district & session judge, Y. Maangkaba Imchen-i kulitem tejangja nguteta April 11 nü iba tetuyuba agütsü.

Arishi küm 28, Thanwalo Magh anema aibelen onük ana-

tashiyim amshia raksatsüba aser yirutsüba nung ajemdaker ken o benok, ta PP Kath-i ashi.

Kath-isa, Investigating Officer (IO) Livinuo Sub-Inspector aser lar teloki iba ken o bushisingdangba maparen junga inyakogo, ta ashi.

"Tamalen ama masü saka tawabo Nagaland nung tashiyim amshia taküm raksatsüba ken otem kanga bulor, aser iba ama aibelen ken o dak sentakba nung court-i takoksa angur, nübur aser police amalitep nungdaker," ta paisa ashi.

Kath-isa sensotem dang, ozüng kübok aibelenertem nem temerenshi agütsütsü atema court den amalitepa inyadaksünar, ta mepishia metetdaksü.

Mobile tower ajanga timtem agütsüba bushiteta mali: Manoj

New Delhi, April 20 (Agencies): Mobile tower tem ajanga 'radiation' adokdaksüba teblemstü dak sentakba nung tanü Telecom Union Minister, Manoj Sinha-i, tang tashi nungbo mobile tower ajanga temang nung timtem agütsüba study tem

ajanga bushiteta mali, ta metetdaksü.

Union Minister-isa, alima linüktem den medemangra India nungbo radiation emission ji kanga ajema lateta lir, ta metetdaksü.

Gwalior nung arishi küm 42 cancer agi shiranger kati

temepishiba ka benokba nung ajemdaker Supreme Court-i BSNL indang mobile tower ka shibangtsü tuyuba sülen minister-i item o ya jembio.

Sinha-isa, "Tesüiba ita pezü nung 'call drops' shilem 60 ajema kümogo," ta metetdaksü.

Tzürangkong nung 27 buba NSF lokti senden amungtsü renemer



Mokokchung, April 20 (TYO): Naga Students' Federation (NSF) pur 27 buba lokti senden taküm May tatemlen Mokokchung district kübok

Tzürangkong nung amungtsü asoshi mazüngi maparen balala inyaktepdagi. Taküm iba mungdang ya Ao Kaketshir Mungdang (AKM)-i host süa ayonger.

AKM tir tassenba Sp. Imkongwati anir par külem medemertemi mungdang takok ngudaksütsü nükjidong yur maparen tapu balala inyaka odaki.


AKM Organizing Committee convener aser taoba NSF tir Imchatuba Imchen aser par külem medemertemi Tzürangkong local organizing committee den kanga junga amalitepa aser tongtepratepa maparen balala inyadaki aser par telokisa April 15 nüto mungdang akatsüba tesem sendanga liasü.

Assam den artsü süa aliba Tzürangkong kübok yim tajemba agi ti (8) shi lir aser tang NSF mungdang kiji Chungtiayimsen yimdak yangludar. Asenoki

metettsüba kaji taoba 2009 küma AKM-i host süa 23 buba NSF lokti senden Mopungchuket yimdak mungogo.

"Joko mungdang anasa arur asünung, iba sentong takok angutsü asoshi kija, lokti aser senso nübur ajaki amalitepa yaridaksünar", ta AKM tir Imkongwati aser AKM Organizing Committee convener Imchatuba nati mepishia metetdaksü. Iba mungdang nung federating unit balala nungi delegates meyi anashi arua adentsü imladaki.

LKMCECC-i political party lenirtem den sensaksemtsü



Langpangkong Kaketshir Mongdang Clean Election Campaign Committee (LKMCECC) purtemi asen lima nung election timi agitsü asoshi nübortem nem angatetdaksünüba o kar sü nung (banner) zülur tongtibang lenjem shia nung yutsüba sentong ka tenzükogo. Iba banner ya Changtongya town lenjem ka nung angur. (CTN. April 20, 2017)

Mkg. April 20 (TYO): Mokokchung nung ayongzüka lir. Nagaland nung kechisüdirsiaka Langpangkong nung Iba sentong nung election timi agitsü nükjiong Nagaland nung political party Langpangkong nung shibasa nung LKMCECC-i April 22, balala nung lenirtem den political party nung national, 2017 (Honibar) anepdang 10:00 election timi agitsü asoshi state, division, constituency aser ako nung Hotel Metsüben, shisalemsatepba sentong ka unit level tashi nung mendenpurtem lir, parnok ajak party balala nungi lenirtemi arua dendaktsüner ta shisalemsatepba ajanga election LKMCECC sangdong ka timi agitsü lenmang tesadamba ajanga mepishia aser tajungba ngutettsü imlar ta metetdaksüogo. LKMCECC lenirtemisa Iba sentong nung political metetdaksü.

Zunheboto aser Asukhuto na nung auer anana apu DUCCF-i metetdaksür



Dimapur, April 20 (TYO) : Tongtibang tatalokba ka nung Zunheboto police temi jila nung ita aika auyaa jajaba nisung ana, Akaito Assumi aser Pito Murru na April 2, 2017 nü apu. Tena ya Zunheboto jila nung alir aser tena ket nungi tenati auyaba oset 85 tashi ngutetogo, ta Addl. Superintendent of Police/PRO, DEF Zunheboto : Nagaland sangdong ka ajanga metetdaksü. Sangdong ajanga ashiba agi, tenati auyaba rongnung motor bike, computer, electronic osettem, gas cylinder kar, aser kidang joka nung amshiba osettsüset kar dena liasü. Tenati item osettem ya jila tesem balala nungi ita aika nung auyatenba liasü. Akaito Assumi aser Pito Murru na yagi tenati auyatsü nükjiong aliba ki aser office temji anüngdang kanga junga mita reprangtsü aser aonung tzüngsang tera majungba mapang iba maongkaji agiasa timba auya. Tena apuba ajanga Zunheboto nung auer tebilemstü melii kümogo, ta kasa sangdong ajangsa ashi. Sangdong nungsa, ano tatalokba tanga ka nung Asukhuto jila nunga Atoi Sumi aser Kikaho Aya na auyaba atema April 1, 2017 nü KPA Campus (Khelhoshe Polytechnic Atoizu Campus) nungi apu, ta shia lir. Tena ket nungi tenati auyaa aliba mobile phone tem aser blanket kar nguteta lir, ta sangdong ajangasa metetdaksü.

Dimapur, April 20 (TYO): April 21, 2017 anepdang 10:00 Dimapur Urban Council ako nungi 3:00 ako tashi nung Chairmen Federation verification atema DMĒ (DUCCF) Information & office-i arutsü Publicity Secretary-i sangdong metetdaksüogo. ka ajanga Dimapur kübok Ano Colony Chairman-ia ward no. 3 colony tem nungi beneficiary tem dang iba Housing for All scheme osang mettedaktsüsü mepisir, beneficiaries/applicants dang ta kasa sangdong nung shia lir.

Mkg ADC & MMC Administrator-i metetdaksür

Mokokchung, April 20 (TYO): Mokokchung Municipal Council (MMC) dumping zone koba Ungma lushu nung lir, ibaji January 2, 2017 nungi mamshir asünung, shingaija yangji jana/ali meindoktsüla, ta Mokokchung ADC & MMC Administrator, Wt. Bendanglilai osang ka ajanga metetdaksüogo. MMC asoshi dumping zone tasen ka Mokokchung lushu, "Sabangkaba Menchen" nung yanglua kar, yangji MMC dumper aser ward nem agüja aliba pick-up truck-tem dak alaka tangar kari danga jana indoknüra MMC nungi temelaba agitsüla, ta laisa metetdaksü. Jana indokba tesem (dumping zone/dumping box) nung shiruru tasü mang yutsüba putetra temerenshi alitsü, ta ADC & MMC Administrator-isa tekümdangtsü olen ka metetdaksü.

RMSA tesayurtem training atsülanger

Dimapur, April 20 (TYO): Nagaland Board of School aser Mokokchung, Longleng, Education-i sangdong ka ajanga, Tuensang aser Zunheboto nung mepaidoktetba kuli kar ajanga posting alirtem atema April 25, 2017 nü Induction Training Programme Mayangnokcha GHSS, thinener, iba training atema Mokokchung nung RMSA anogoji sangdongtsü, ta 2016-17 kübok tang tasen metetdaksüogo.



April 20, 2017 nü Peren District Administration den IMCT züngsemtem aser DDMA ketdangsertemi SP Office Peren kübok anentsüh aluba tesem semdangba noksa yangi angur. (DPRO)



Dimapur, April 20, 2017: Brihostibarnü Circuit House, Dimapur nung DC, Dimapur, Kesonyu Yhome IAS-i Dimapur District nung state sorkar mapa asoshi tang tasen shima aliba nisungtem, group B&C traning nung jembiba noksa yangi angur.

Horticulture Dept. Silver Jubilee amungtsü

Dimapur, April 20 (TYO): sayatsü. Sentong nung Garden Horticulture Department Silver Band-i ken atentsü. Jubilee April 27, 2017 nü Capital Horticulture nung mezüng Convention Centre, Kohima nung Director, Dr. K. Chuba-i tesüiba amungtsü aser iba benjongmung mapang bilemteta jembitsü aser nung tongti tesemdangerji Horticulture Department tekolak, Nagaland aser Arunachal N. Amos Ao-i tang department Pradesh Angh, P.B. Acharya jenjang metetdaksütsü aser asütsü. Horticulture Parliamentary Iba Jubilee sentong nung Secretary, Kejong Chang-i Jubilee Souvenir aser Memento Jubilee salem lemsateptsü.

Assam nung 'gelatin stick' 600 aser 'detonator' 400 apu



Guwahati, April 20: Army aser Assam police-na senteper Assam, Kamrup district kübok Sakhati tesem meita aoba mapang tapokba oset apuba noksa nung angur.

Guwahati, April 20

(Agencies): Army aser Assam police-na senteper Assam, Kamrup district nung nisung ana 'gelatin stick' aser 'detonator' bener puogo, ta mitkar indang otongdar kati tanü metetdaksü.

Army aser police-na senteper yasüng Boko tesem meita oa liasü aser item osetem ya tim masüba maparen kar nung amshitsüba liasü ta temolung melemeba, otongdar-isa ashi.

Tapokba oset apuba nung 'gelatin stick' 600 aser 'detonator' 400 liasü aser iba ken o dak sendakba nung nisung ana apuba, ketdangseri shisem.

Bongaigaon-Guwahati National Highway nung tapokba osetem aika bener senzüba osang tejangja Military Intelligence ajanga agütsüba sülen Gajraj Corps nung Red Horn division aser Assam police-i meita ao.

Security force temi gari

senzüba kanga junga ladanger Boko tesem nung gariji anendaksüa bushiba nung, gelatin stick 600 aser detonator 400 ya ngutet.

Iba sentong ya kiralongrar teraksatsüba maparen balala rakdoksü nükjidong nung inyakba maparen nung shilem ka lir. Army aser police-na kanga junga angatettepa inyakba ajanga iba ya takok angu, ta mitkar indang otongdar-i maneni shisem.

Mozüki nungi tasü mang bener aotsü asoshi sentong amenloktsü akok: Sarma



sorkar ajak len nung aitsüba sülen Sarma-i iba olen lemsatop.

Lanursangi ashiba agi, par yimdaki aoba lenmang kanga tamajung aser lendang au apu aika aliba ajanga gari balala aser ambulance aotsü asoshi tamakoktsü, ibayongji pai par kinungersang tasü mang bicycle nung arakloker ao.

Guwahati, April 20

(Agencies): Bodhbarnü Assam Health Minister, Himanta Biswa Sarma-i ashiba agi, state sorkari mozüki nungi tasü mang bener yoktsü atema sentong ka tenzüksü asoshi asadangtsü akok.

Taoba mapang Assam, Majuli asetkong nung lanur kati par kinunger ka tasü mang mozüki nungi par kidangi bicycle nung alenoka bener aoba tatalokba nung state

Taitsüba balala aruba nung Health Minister-i ashiba agi, nisung ka sür külenbo ibaji Health Department khuret masü.

"Health Department-i taküm alirtem khuret abentsü. Nisung ka sür külenbo Social Welfare Department mesüra item amala dak sendakba nung inyaker NGO tem khuret lir. Tasü mang belentsü asoshi ambulance mamshitetsü kechiyong aji ta süra tasü ngdangba aika

adkotsü," ta Sarma-i ashi.

"Tang ambulance service 108 aser 104 amala shiranger mozüki-i bener aotsü asoshi agütsüdar. Aji süaka tasü mang belentsü atema iba amala service mali. Mozüki nungi tasü mang bener aotsü atema onoki maparen balala asadangtsü nüngdaker," ta paisa ashi.

Tasü mang bicycle nung bener aoba osang television channel kar nung sayuba sülen Assam Chief Minister, Sarbananda Sonowal-i State Health Services indang Director, Majuli-i yoka liasü.

Majuli ya alima nung ayong asetkong tulutiba lir aser iba ya Assam kübok district ka lir. Iba constituency nungi Sonowal ya legislative assembly election nung menden atema toktepa adokba lir.

China-i Arunachal nung tesem 6 nungja tasen agütsü

Itanagar, April 20

(Agencies): Taoba hopta Dalai Lama-i Arunachal Pradesh (AP) semdangba sülen China-i AP nung tesem 6 tenüng melenshitsü. Iba tenüng melenba sülen anogo ka lir Brehostibarnü, India-i ashiba agi, tenüng melenshiba mesüra tasen ka puratetba ajanga ozüng dak alema ali rakzüka alibaji parnok indang ta temeden magütsür. Osangbenertem dang External Affairs indang odongtar, Gopal Baglay-i ashiba agi, "Arunachal Pradesh ya India nung shilem ka lir."

Mongolbarnü Chinese Ministry of Foreign Affairs odongtar, Lu Kang dang iba telemtetba ya Buddhist tamangba yimsü lenir-i state

semdangba ajanga agi asü, ta asü ngdang dang pai iba dak sendakba nung telangzüba tejangja magütsü.

China nungeri tesem 6 tenüng melenshiba temji: Wo'gyainling, Mila Ri, Qoidengarbo Ri, Mainquka, Bumo La aser Namkapub Ri lir. Item tenüngtem latitude aser longitude asadanger ngutetba agi, Tawang, Kra Daadi, West Siang, Siang, Anjaw aser Subansiri tesem tem tenüng melenshitsüba lir.

China-i yangluba sentong ya mongintem kari ashiba agi, parnok litsü asadangba maparen ka lir, saka China nungeri ashiba agi, iba ya nütsü ng yongsük asadangba dang lir.

'Red beacon' agientsü lemtetba atema Sonowal-i Union Cabinet tenü ng asang



Sarbananda Sonowal (F/photo)

Guwahati, April 20

(Agencies): Minister, bureaucrat, politician aser VVIP tem indang gari nungi 'red beacons' agizüksüba dak sendakba nung Brehostibarnü Assam Chief Minister, Sarbananda Sonowal-i Union

Cabinet telemtetba tenüngsanga liasü. "Garitem nungi 'red beacon' agizüka ayutsüba telemtetba ya Ato Kilonser, Narendra Modi indang India tasen ka yanglutsüba nükla nung jenjang ka lir," ta Sonowal-i ashi.

Union Cabinet-i iba telemtetba agiba ya kanga dang tasütait jenjang ka aser otsüsütsü maparen ka lir. "'Red beacon' amshiba yimya indokba ajanga linük nung 'democracy' inyakyim tali tashi taitba akümtsü," ta paisa ashi. Iba ken o dak sendakba nung Sonowal-i state nunga garitem nungi 'red beacon' agizüka ayutsü asoshi tetuyuba agütsüo.

Lanurtem asoshi Manipur sorkari sentong saya

Imphal, April 20

(Agencies): State nung lanurtemi pei sasa taküm liyonga otettsü nükjotong nung 'Pradhan Mantri Kaushal Vikas Yojana' kübok 'Skill Development Centre' ka Imphal nung Manipur Chief Minister, N. Biren Singh-i lapoktsüo.

India Ato Kelonser, Narendra Modi indang 'Skill India' onük nung ajemdaker Union Ministry of Skill Development & Entrepreneurship ajanga 'Pradhan Mantri Kaushal Vikas Yojana' scheme ya tenzüng

Iba sentong indang nükjotong ya, lanurtem aika nem parnok taküm tajungba nung liyonga aotsü asoshi industry balala dak sendakba tesayubatem agütsütsü lir.

"Employment exchange balala nungi osang agütsüba ajanga Manipur nung mapa mongui aliba lanur ya lakh 7 dak tali lir," ta Chief Minister-i ashi.

"India nungeri ajunga nem mapa agütsütsü ya Ato Kelonser, Modi indang mangdang lir aser iba

mangdang asangsang kümdaktsütsü asoshi State Cabinet-i Manipur Skill Development Mission ya Labour & Employment Department kübok mapa küma inyaka aotsü lemtetogo," ta Biren Singh-isa ashi.

"Iba Centre nungi computer amshitsü tesayuba agütsüba ajanga Manipur nung aliba lanurtem mapa mangur malitsü," ta iba Centre nung tang training agir, Newmai Jonah-i pelasetta ashi.

"Lanurtem dak sempet peria maliba ajanga tanü-asü ng mapa angutsü kanga tasak kümogo," ta 'Pradhan Mantri Kaushal Vikas Yojana' nung tesayur, Gurumayum Satyen Sharma-i ashi.

"Saka iba scheme ajanga onoki state nung lanurtem nem 'skill development' maparen balala sayur aser iba ajanga parnok mapa bushiba nung teyari agütsütsü," ta Sharma-isa ashi.

"Iba ajanga state nung rongsenketsü ng nung terenlok tali kümdaktsütsü," ta paisa ashi.



Agartala, April 20: Brehostibarnü Agartala yimti tezülen aliba ayong takong ka nung 500 aser 1000 shidi sen tejenba aika ngutetba noksa nung angur.



TIR YIMYIM

YIMOBILEM (EDITORIAL)

DIMAPUR FRIDAY, APRIL 21, 2017

Naga yimten tenük sakba

Naga nungér tangar khu bener France lima tashi aoba sülen taküm 2017 küm agi küm 100 ajungba temaitsü Kohima nung long ka azünga amongtsü bilemtetbaji junga bilemtetogo. Atangji, Naga nungér France limai aobaji merataket otsübo masü kechiyong tangar khu bener aoba otsü dang lir. Ajisüaka, Naga nungér yimten tenük lapoka nüchi kuma aruba mapa aser mapangjibo tangar khu bener jajaba mapang ya liasü. Ashi, 1917 küm tangar khu bener Europe lima tashi aotsü mapang ya maru asübo tang tashi Naga nungertemi pei yimten temeten memetet aser merajemi tangar bendanger kübok kasa khu bener amai lila ta bilemer. Aji oda, Naga nungertemi Naga nungertema ta memeteti alidang 1872 küm Naga limai Khristan yimsü aru. Iba jagi Naga nungér, talisa Aortem sobaliba tamajung aika melenshia shirurudem den kecha balaka mepilai aliba tia nungi nüchi kuma lia aotsü tenzük. Ajisüaka, 1917 küm alima mezüng tongpang nung Naga nungertem British nungér khu bentsür France limai mao tashibo Naga nungér shisatsü nung Naga kintem ajak longjemer British nungér ama yimten ka kumteta temzüng ozüng ka kübok alitsüla ta merajemi aru. Atangji, Naga nungertem among adena tangar khu bener ayazüka mao tashibo pei yimtsüng aser pei kinji dang alima tatem ama bilema külemi longjemer Naga lima külem yimten ka yangertsübaji pongmang nunga mepongmannga mapang ka liasü südi. Aji oda, alima nung timtem agi aleper temoatsü aser maongka arur süra Naga lima nung France tashi tangar khu bener aotsüsa akumba timtemji Naga nungertem asoshi yimten nüchiso tenük lapoktsüba maongka anguba mapang ka liasü. Iba mapangang Naga nungér o Naga nungér nata ajurutepa metettep aser oshio ben balala süaka shilubo kasa, anungji tapokdakbo ka dang asütsü ta tangatetba nung parnok o parnok na chichiba tedi tenu ama bilemtepa bendanglen timtem mapang maparen aisü nung yariteper alitsü. Iba jagi parnok rongnung tali telongjem adoka Naga nungér longjemer yimten jenjang ka latettsü asoshi nungdakba indang ken o süka jembisüdi. Aji oda, 1918 kumbo Naga lima tonga arur, pi khu benertemto pei nübortem anitetsü asoshi tanishir kümer Naga Club tenzük. Naga kintem asoshi telongjem ka tenteta alima dang Naga kin lir ta metetdaksübaji Naga Club tenzüka Naga nungér lokti nungdak aser yimten temeten indang jembisüdi tenzükba ajanga liasü. Atangji, kasa mapang nung India nungertema British yimten talenba nungi salatsü asoshi prangpong injang amshia masü saka Mahatma Gandhi nungertemi anir tangatetba aser raraba mapang ka liasü. Ibaji mesüka Naga nungertemia tangatetba agi, kodang 1929 küm British yimten ajanga India yimten tia reprangdangtsü asoshi Simon Commission yok, parnok dang Naga nungertembo India kübok mesüi balaka sadoksadoka linüba tejangraba aser temeten Naga Club ajanga metetdaksü. Küm 100 jakdang Naga nungér tangar khu bener France tashi orr arua Naga nungér telongjem ka tentetter Naga nungér tarutsü lanurtem asoshi yimten nüchiso jenjang ka latettsütsü nungdak ta angateta jembisüdi kanga tulu liasü. Atangji, Naga nungér khu bener France-i aoba anogojia tongtibang saka ano parnok France nungi arur külen Naga Club tenzük bajisa tongtibangba. Aji oda, 1918 küm Naga Club tenzük süra sangküm 2018 küm Naga Club küm 100 ajungtsü. Ibaji Naga yimten nüchiso asoshi rara tenzük küm 100 ajunger asütsü. Kohima nung tamalen Naga Club pur ki asüba nung tang NSF office lir. Atangji, tanübo tenüng dang ashisü, Naga Club mali kumogo. Ajisüaka, maliyonga lir amato aser Naga club tenzükertemjia tanü asenok den taküm ali amato bilema Naga Club centenary ayongzuka mongra, ibaji Naga nungér asoshi yimten asentenshi mapang ka asütsü. Naga Club centenary ya NSF teloki Naga nungér kin aser tenüng tajung akaba lokti tentet shia telongjem nungi lenirtem jadena sentong yanglur mongra, ibajiang tapetba, tajungba aser temoatsüba asütsü.

OLEMSABANG

Asen tsürapur tekülemba aser sobaliba balala ratet

I. Tamsü Jamir.
Landmark Colony, Dimapur.

(Maneni yashi adok nungi...)

Moatsü aser Tsüngremmong ana balala ratet

Sobaliba aser tekülem ratet züluba nung tazünger ajaki tena koda balala jangja-a angatetogo ta imlar, iba tangatetba nungji ajemdaker Moatsü aser Tsüngremmong ana ya Sobaliba nung adentsü asü Tekülemba aser anempong nung adentsü, tena among ya amongtsü asü mamongtsü ? Ibai angatettsü atema ano ni Moatsü aser Tsüngremmong ana indang tatongi zülur.

Asen Aor sobalirua aruba Tsürapur otsü aser ken bushiba olemsabangji Moatsü aser Tsüngremmong ana ya dang lir. Saka ibaia kenten menü aser inyakyim ajak meyakteper ka dang kümer among ana teratet makai küm nung anaben monga arudang tangar dang among tetezü meshiteti akümer, anungji ano iba among ana balala indang teratet lemsateper. Tir Yimyim adok nung Moatsü aser Tsüngremmong ratet aiben pei pie-i angazüka aliba den tangatetba balala züluba aika asenoki zünga aruogo. Saka tanü mapa kuma inyakba aser pei pei tebilemba shidangba nung tangatetba balala aika dang angur. Tatishitsü agi, Tir Yimyim adok Sunday August 14 /2016 Moatsü aser Tsüngremmong benjong sentong Arogoi achayanga among nunga koma süla (?) ta asüba nung tangatetba balala shidangba Q 24 tashi balala dang lir. Ano Tir Yimyim adok 4th August 2015 Yimobilem (Editorial)-i züluba Tsüngremmong amongtsüla, ta züluba nung Moatsü yabo japujaritepa amongba nüktapangta benjung ka amai liasü, ta zülua angudang kanga dang sasaa bilemstsü. Ano Tir Yimyim 1 August 2015 nung Aor ita aser hapta nung anogo tenüngtem ta asüba nung Tsüngremmong Alu ruzükerang amonger ta shia lir. Nükjidong aser nungja ka dang saka tangatetba balala aika angu nung ibai lirumedema Aori mapang lateta doktsüba anogo nungi tenzuka amongtsü atema lemsateper. Asen tsürapur Aluyimer mazüngi dang liaka yimer ajak süngküm shibanga yur küm ka nung among 17 tashi retreta monga aru, aser amongba shia parnok tsüngrem balala nem Ak ka, An ka, aser entsü ka, ta dang agüjia retreta külema aru, saka item rongnung Moatsü aser Tsüngremmong ana nungjibo Ak ka dang masü saka telok balala shiai Ak aika tepseta yur nüpur ajak pelatepa benjong dang süa monga aru. Ano iba among ana nungjipo tekülem aser anempong kanga retabo malinungji asenoki tanü tashi monga arur. Saka among anaji kenyongi balala nükchidong balala, inyakyim balala, tsüngküm balala. Anungji iba among ana koda balala iba teratet indang lemsateper.

MOATSÜMONG : Yimtsüng shia yimya aser sentong terara balala alitsü akok saka ni ngua aruba lemsateper. Ano nükjidongpo yimtsüng ajak atema kasadang. Iba Moatsümong ya 1st May nungi 3rd May tashi amonger, saka yimtsüng kar nungbo talia amonger. Tongtipangsa Moatsümong ya taleptatsünger aser takar atema süpotsü balaka shisanga sayutepa amongba benjong rongnung tulutiba lir. Aluyimer Alu nung metsü yokba den tsünüsempongtsü ajak yoker joko miwa arutsü mapang metsü yokba ajak nung temoatsü sudakjiang ta anüng tsüngrem, aser ita, anü, dang temoatsü meshia amonger.

1st May, iba anogo dang süngbennü ta ajar iba anogo nung süngpu züngai Arju nung ak achitsü atema nungdak ajak bendena amonger. Tanüngba Arju nungér ajaki aonung sangwa-a yartsüngsang dang atsüktsü atema moapu tesatem ka nung süng bendentsü. Ano yimdak aiürtem ajaki yartsüngsang dang agitsü atema nokleptsü angüsü aser subotsü tajung agi toktepa yanglur asangur nem agütsür. Tanüngba nübor ajak achiajemtsü aser sübosülemtsü renemshia amonger.

2nd May, iba anogo dang chintinü ta ajar, iba anogo nung lokti balalai ak aa-a aliba ajak tepsettsü, aser iba yabo kecha tekülemba mali nung kecha ashishi mekai dang tepseter. Ano Arju shia nung ak anana tepseter aser iba yabo anüng tsüngrem, ita aser anü tenüng tetshia taküm metsü süngjang yokba nung temoatsü agüjang ta sarasademer mesüra atakatemer tepseter, aser yangia kecha anempong mali.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

L.Hotovi yim Baptist Arogo Hon Jubilee mungogo



April 20, 2017 nü L. Hotovi Baptist Arogo Jubilee nüngshilong sayaba sülen Rev.Dr. Hevukhu den L. Hotovi Baptist Church Pastor, Lujeto Yeptho aser Golden Jubilee Committee züngsemtem külemi tangokba noksa nung angur. (Dimapur, April 20, 2017)

Dimapur, April 20 (TYO): nung tongti o jembiriji Executive Yepthomi-i Jubilee mungertem Secretary WSBK, Rev.Dr. pelaa agizük. April 20, 2017 nü L.Hotovi village Baptist Arogo Golden Jubilee benjongmung mungogo. Iba Jubilee sentong omen "Proclamation of Liberation" nung sentong ya Pastor LHGBA, Lujeto Yeptho leniba nung agi aser Head G.B. Hotovi Kasa sentong dak sendakba nung Jubilee nüngshilong sayatsü, sobaliba densema ken balala aten.

'Brio' kaket 'Biblical Worldview' keter adoka lir

April 20, 2017 : Tain longlong akaketji tan May ita nungi tanaben adoktsü. 1990s mapang Brio kaket yaa tanga kakettem den mesükteper liasü. Iba kaket azünger Debbie Fischer-i ashiba agi, iba kaket ajanga kü dang tantsü tambutemi mesayuba, sobusolemtsü yimya ni angazükogo. "Ni high school nung tezüngdak liasü aser ni küsasa ni junga angutsü asoshi anepalu mashi liasü," ta Fischer-i ashi. Fischer ya tang arishi küm 34 tain lir aser Madison nung alir. La tang ya insurance company ka nung inyaker. Lai, 1990s mapang iba kaket azüngba mapang Boyz II Men kentener teloki atenba "I'll Make Love to You" atema tekümdangtsü shia aliba bileteter, ta ashi. Brio kaket ya 2009 küm nungi madoki anen kechiba süra iba kaket adoktsü asoshi senotsü peria maliasü. Saka tang nungi ano maneni kibongtem dak rangloker laishiba tesayuba densema adok tenzüksü.

Bushisüngdangertemi Yisu dak nungi jakzükertem bushir



April 20, 2017 : Mang azüba sü nungji nisung ka indang noksa adoka lir aser aikati iba linen süji Yisu mang azüba sü ta amanger. Khristan osang ka ajanga ashiba agi, iba bushisüngdangba maparen ya Easter Sunday nü History Channel nungbo sayuogo. "Parnoki (bushisüngdangertem) Yisu indang DNA tila ka danga ngutet nungbo tanü asenok rongnungi shirsa Yisu dak nungi jakzükar ibaji metettsü asoshi aser iba dakji alaka ano Yisu taküm indang tali jangja metetba nunga yaritsü," ta History Channel nung sayuba mapang ashi. Tesüiba mapangtem nungbo Yisu indang DNA bushidanga asadangtsü kanga saaker liasü kechiba süra Yisu mang azüba sü nungji nisung aika indang DNA keta lir. Ajisüaka tangbo science tsütsü terenlok kanga kaa 'genetic' tendangba nung balaka kanga renloka aoba ajanga bushisüngdangertemi alemli aser tanü asüng na indang DNA tem bendangtetsü akoker. Bushisüngdangertemi Yisu mang azüba sü nung aliba DNA, Yohan Baptitsüba indang DNA aser Yisu adianu, Yakob indang DNA tem kanga junga tendanga item DNA ji putep asü meputep ibaji asadangdar. Ibaji putep nungbo parnoki (bushisüngdangertemi) tanü asenok rongnung aliba Yisu'er kinungertem bushidangba mapa tenzüksü.

ANO GO ABEN TSÜNGREM DEN

ELIJA AINKAR ASOBA

Aser parnok jembiyonga oa alidang, ajiang mi talongtsü aser mi kortem adoka tena (Elija aser Elisha) balala piladaktsü aser Elija Tsüngrem mopung agi kodaki anir atu. - II Chuba 2: 11

Alima nung chuba nungi alar ajak süogo, südagi aser asütsü. Saka alima tenzukli nungi leper makaba tasübaji Elija ainkar ya lir. Elijaji Tsüngrem nisung, Pa tembar, Tsüngrem mulunglemba ainkar ka liasü Tsüngrem mulungsüa pai tenzük. Anungji Pai pa nungdak ajak nung Elija ajanga sayatenya aika inyak. Pa (Elija) Tsüngrem nisung, Tsüngrem mulungjang tener Pa lenmang nung jaja. Pai Tsüngrem tashi anga-a temeshiba sobutsü subor küli asü. Tsüngrem noksa agi alima dang küli asü. Alima nung Pa wadang temer Elija Tsüngrem mopung agi bener atu. Alimai pa tasüba mangu. Tanüa yamaji Tsüngremer wadang temer Pa den alitsüsa asenoki asen mapa aser tamang meyipa bushidi. Asen dak Tsüngremi Elija dak mulung lemtet ama na aser ni Pa küli südi?

SARASADEM
Oh Kibuba, Nai molung lemtettsüsa alitsü ni yariangma ta mepishir. Amen.

Anogoshia alima nung Khristan 322 tepseter



Yisu dak amangba atema nisung ka tekolak tangzükba noksa ka yangi angur. (File Photo)

April 20, 2017: Tesüiba küm Khristan putiotsü dang nungibo pezü tsüngda nung Khristan aso 20buba nung ang tamangba tem amakba kanga bulua yimsü dak sentakba nung nisung timba asür. Iba ya ISIS ajanga südi ta bilemer," ta metetdaksü. "Sarasadem agi alima ajak ayimjemer aser kodang nisungtemi Khristantem tepsettsü merangdir, Khristan lima rangbeni reshikangshi ajururtemji pusemer," ta paisa ashi. Tesüiba hopta ishika tsüngda Egypt nung Tenla ki aika makogo, aser tamangertemia tetsübu nung tekülemdaki nung asenok lidar. Akhidang

Khrista shia aruba tepela ajangshitsü atema temulungjang lapoktsüla: Pope

April 20, 2017: Pope Francis-i, Khristan tamangba yimsü ya Tsüngremi asenok bushiba indang lir, ta ashi. Khristan tamang ya taochi lir, aser iba ya tasü madak shia aruba tepela angutsü atema temulungjang kishi lapoka alirtem atema lir, ta paisa ashi. Tanü hopta shai aliba sentong ka nung Pope-i, "Melungjang kishi shibanga alirtemi Khristan osang- Tsüngrem temeim ajanga Khristai tasümadak takok ngua shia aruba indang mangatettsü," ta ashi. "Khristan tamangba yimsüji iba ya lir, aser iba ya tesüngmangtsüka lir. Iba ya asenoki Tsüngrem bushiba asenoki Tsüngrem bushiba asenok rongnung aliba Yisu'er kinungertem bushidangba mapa nung Pope-i tenyar Paul-i Korint Arogo dangi mezüng shidi züluba tetshia Khristan indang osang tiyongtsüji tasü madak shia aruba lir, ta ashi. Pope-isa, "Khristan tamangba yimsü ya yangi aso. Iba ya tangattetba ka masü saka tatalokba ka nungi tenzükba tamang lenmang lir, aser ibaji Yisu Khrista'er nütsüngtemi tama ajangshi," ta ashi. "Tenyar Paul ya Arogo reshikangshir ka liasü aser pa mapa tamajungtem atema pai asüküma bitem, ajisüaka khenü anogo langka atalok: Damasca lenmang nung shia aruba Khristai pai ajuru," ta paisa ashi. "Tanü Pa asenok den lir, masü saka Tsüngremi asenok aser maneni asenok yongtsü nung lir. Yisu yangi lir, pa taküm lir aser shia aruogo," ta paisa shisem.

OLONG PAITEP # 4398

1		2			3			4		5
							6			
7			8							
							9			10
		11								
12										
					13					
14				15				16		
17										
							18			

TIPILEN

- Ozü tashikang aser tepenjok - (4)
- Tarutsü indang ashi - (4)
- Yimer ajak - (7)
- Süngdong tetenzükdak - (4)
- Nokleptsü nailokdak - (7)
- Tebang nung enok - (4)
- Tsürabur nungi lemsükba - (7)
- Tetsür tanur dang ajaba - (4)
- Shirang ajung - (4)

LANGTSÜNGLEN

- Pei tasoli - (3)
- Iba anogo - (4)
- Telemsa / Lemdanga ayuba - (6)
- Maneni - (3)
- Tekaratiba nung - (5)
- Ki tema - (5)
- Temejung - (5)
- Teimla ayu - (5)
- Tajatsü - (6)
- Hai ta ashi - (4)
- Anogo semer ka - (3)
- Tashi balaka - (3)

OLONG PAITEP # 4397 TELANGZÜBA

TIPILEN

- Ashiochtsü, 3. Sotak,
- Nai, 6. Ate, 8. Lemtur,
- Nungit, 12. Ong, 13. Nok,
- Yimsü, 15. Noksajong.

LANGTSÜNGLEN :

- Atsulang, 2. Sanen, 4. Rama,
- Arang, 7. Awatsung,
- Ngüm, 10. Pokpo.

LUNPAK SHINU ARISHIDANG LUNPAKMA NUNG AKO

Sobangba : Temba... ni tanü-a ne dang o ka asüngdangdi nai melakidang rateta shiangma noo... "Lungpak shinu arishidakng lungpak nung ako" ta jembiba ya kechi tetezü akaa...???

Alokba : Temba.... kechiba masüngdangtsü odang asüdangang nii... Ena temba ya tangar dak atalokba masü, saka nubo tajung lenir tajung ka kenu anogo ayong nung tzü chikorba... Shinu topur tajung sentsü tapu tapu keter ka lunpakma nung arua adem...., iba shinuji apotsü arishidang lungpakma nungji ako'er tetsung - tepen ajak kosuk aser teberem-a raksa, aser joko taküm piyong lemtar kecha minyaktettsüsa küma-adok adii... Shinu-ji tereprangtsü küla topur tajung ako, saka aji tachitsüla oset kata masü... kecha nunga agitsüla-a masü..... saka iba shinu meji nung taküm piyong lemtar kazütsüsa atongtet adi.... yamaji asen mimchir yagi khen tenuk pelatsü tagitarutsü kar penpua arishidang tsürabur senmang maongka tajung ako-doka-adoker.... suoshi tajung nung anak teploker.... aserbo tatongokdak maka nubo ka küma-adok adii...

~ L. Kika Pongener, Aoyimkü, Dimapur.

TANÜBO NAI LANGZÜANG

Q. Tawa India nung mezüngbuba süa NBA Basketball School koba city nung lapoka lir ?

- [A] Jaipur [B] Pune
[C] Mumbai [D] Rajkot

(Taruba adok nung onoki langzüsü)

YASHI ADOK TELANGZÜBA : A V Narasimha Murthy

Happy Birthday

TENUNG : ROSELIN

Tasoba anogo : April 21

Kum : 10

School : Bhavan's Public School, Chennai

Talidak : Chennai, Tamil Nadu

Obou, Otsü, Tsürabur aser Kinungertem ajaki na asoba anogo nung Tsüngremi arishi maneni moajang ta sarasademtsür, Salem.



Tanur asoba anogo nung salem osang den noksa angati adokdaksünöra - Tenüng, Kum, School, Talidak & salem osang tejanga zür, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



- Tenüng :
- Tasoba anogo:
- Kum : 4. Class :
- School :
- Talidak :
- Salem osang :

NAIA YA METETER MA



Sessa Orchid Sanctuary ya Himalaya tenemtsüng Bhalukpong Forest Division West Kameng District, Arunachal Pradesh nung lir. Iba atsüh nung orchid tapu balala Dendrobium, Bulbophyllum, Coelogyne, Eria, Phaius aser Liparis nungertem angur.

SUDOKU # 3511

TELANGZÜBA # 3510

		9	6		2			8	5	7	6	9	1	2	4	3	
5	2			7	1	6		4	9	2	6	4	5	3	7	8	1
8	6						7		4	3	1	2	8	7	5	9	6
	3	8			7	4		2	7	6	3	5	1	8	9	2	4
6		5	1	2	4	8		7	1	9	4	7	2	6	8	3	5
	4		3						5	8	2	3	4	9	6	1	7
	1		7		5				3	1	8	9	7	5	4	6	2
			2	4	3		1		6	4	5	8	3	2	1	7	9
2	5	6	8		9	7		3	2	7	9	1	6	4	3	5	8

OJANG LUTEP # 4003

- ANÜTANGTSÜ :
- MAÜTSNGANÜ :
- JGRATEANMTSÜ :
- JAMATNGRAEM :
- SEMPATETSÜ :
- ESEMMPATSÜ :
- JUNTAG :
- AJUTAMNG :
- EPRARNGNÜR :
- PRANMEREGNÜR :

OJANG LUTEP TELANGZÜBA # 4402

NISUNG AJAKI TEMANGBO ANEMA LINÜR
SAKA AIKATI ACHIAJEMNUNG MAZÜOKER

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Nai angatetbatem tangar den lemsateptsü temela, saka nai kanga junga rasaa meshitetsü. Anungji tanü nai o kümdanga jembitsüla.



Taurus
20/4-20/5

Nisung aikati nü akhum tsübur aser nai rarabangsen nungi pila alitsü merangtsüla. Nü yimya nisung aikati repringdar, ta nai metettsüla.



Gemini
21/5-20/6

Tanü medemertem den jembishinüba nung na tanir asütsü maongka arutsü. Anungji nai kanga junga bilemdanger ola adoktsüla.



Cancer
21/6-22/7

Kima yimdong nung mangatettep adokba aser kinunger tsüngda adokba mangatettepji balala lir. Anungji tanü nai item tetsüngda angateta inyaksangshiang.



Leo
23/7-22/8

Tanü nai mapa tajung inyaktettsüsa maongka angutsü. Saka na mükemdangi lira tangari na mela ashioksütsü akok.



Virgo
23/8-22/9

Nai maparen ajunga jangja-jangja meteter ang inyaksü bilemtsü. Saka na asoshi tongtimbang masüba mapa nung tanü nü mapang meindok tajungba asütsü.



Libra
23/9-22/10

Na anasa aliba nisungtem aika anisüngzük molungjang küter angutsü. Anungji tanü na anisüngzüka alitsü sentong ang yangluang.



Scorpio
23/10-21/11

Tanü na ain adoktsü asoshi kanga melar asütsü aser iba ajanga memeteti lendongi ayitsü. Anungji na tanü ki telung nung süngjema ali tajungba asütsü.



Sagittarius
22/11-21/12

Tanü nisung kari nü den mezüngmeshi o jembitsü südi. Aser iba ajanga na kanga jashitsü. Anungji nai mashi nisung den sensaksem masütsüla.



Capricorn
22/12-19/1

Tanü nai mapa mela akoktsü lenmang mobushitsüla. Mapa tezüba akokba dangbo mapa tasak ka nung meranga inyakba nung konang tuluba angur ta bilemang.



Aquarius
20/1-18/2


Tongpang ka nung nokdaker ajungai takok mangur. Aser tamakok aluba ajanga na tarutsü asoshi shisatsü angur ta tanü nai bilemang.



Pisces
19/2-20/3

Nisung kari na ashioksütsü asoshi sentong yanglutsü akok. Anungji tanü nai maparen ajunga nung shisa ka-a inyakang aser sentong tamajung nungi jenbua alitsü lenmang bushiang.

Katy Perry sapurtemi la aitsü



Los Angeles, April 20 (Agencies): Pop star Katy Perry-i Instagr nung Hindu nunger tsüngrem Kali noksa post asüba atema nisung aikati ibaji mezüngmeshiba maparen ka ta aitsüogo.

Arishi küm 32 tain 'Chained To Rhythm' kentener-i 'photo-sharing website' ajanga Kali noksa ka lemsatepa liasü. Kali

ya teraksatsür tsüngrem lir aser iba dak sendakba nung lai yamai zülutsü, "tang iba 'mood' nung lir."

Aji saka iba post ya India nung la sülen anidakertemi kanga jungabo magizük.

"India nunger tsüngrem mezüngmeshi tesü...iba dang ya 'mood' ta mejetettsü. Noksa ya delete süang. (la sempabo kecha mali)," ta nisung kati

zülutsü.

Ano nisung kati ashiba agi, kenteneri la 'mood' rasatsü asoshi tamangba yimsü nung sendakba noksa amshiba ya kangabo teshisadanga tajung masü asü.

"Iba ya Hindu nunger lokti atema majung kechiyong noksa nung ajemdaker züluba tetezü aser tesüngremi tatishitsü agütsüba tetezü balala. Lai kechi tebilemba nung züluar mejangja, saka Kali ya tashi aser tasüaitba tatishitsü ka lir," ta Instagram amshir kati post sütsü.

Perry-i India nunger sobaliba jangjaa lir. 2010 küm la Russell Brand den India, nunger kibong akümba yimya nung Rajastan nung kibong küma liasü.

Iba dak sendakba nung Hindu nunger lokti nungia la sapurtemi la pusema, iba ken o kangabo süoki ia magitsü asoshi ashi.

"Ma'am item tesempa osangtem imlibelema tanga... onok karbo tilateri ajak nung jashitsüba yimya lir.. item amala yimya ya linük nung mapang indoktsüba atema maparen tajunga ka kümogo. Nai Hindu tamangba yimsü nung tejangraba sayuba atema kanga pelar," ta la sapur kati ashi.

Julia Roberts nem World's Most Beautiful Woman nungja agütsü

April 19, 2017 (Agencies): Julia Roberts joko küm 50 tajungerdang saka tang tashi la tebor ajungba atema award ngudar. Taküm 'World's Most Beautiful Woman' award züngsema lai iba award pungen buba angur asütsü.

'People'-i 'Pretty Woman' star nem küm 26 tejakdang 'World's Most Beautiful Woman' title 1991 küm mezüngbuba agütsüba sülen la nem iba award tang agi ponguben buba agütsür. Lai 2000, 2005 aser 2010 küm iba award agizüka liasü. Yaküm iba award Jennifer Aniston-i ngua liasü aser 2004 küm kasa award anguba züngsema laia iba award anabenbo nguogo.

Taoba mapang nung 'People' ajanga 'World's Most Beautiful Woman' award agütsürtem rongnung Michaelle Pfeiffer, Cindy Crawford, Nicole Kidman, Halle Berry, Angelina Jolie aser Beyonce nunger densema lir.

Iba tetushi la nem agütsüba atema la kanga pelaba lemsateba metetdaksüba den külemi 1990 küm 'Pretty Woman' kanga nungtugu akümba sülena la arishi küm 49 buba nung tanga kanga temaba jenjang nung lir, ta 'people'-i ashi. "Pretty Woman sayadang ni meliasü. Ni movie tanga ka atema jila tila ka nung liasü, kong film sayudak mezüngbuba

show nung Star Wars sayua liasü. Ni osang kaketem nung 'Pretty Woman' ajanga sen aika aazükba züngshi, saka aji sen aika asü, mesira aji ajunga asü majung ta bilemdanga liasü. Ni chichia kecha memeteti liasü," ta lai 'people' dang ashi.

La cameraman Daniel Moder den kibong kümer küm 15 shi lir aser dena chir; arishi küm 12 tain jakrep Hazel Patricia aser Phinnaeus aser küm 9 tain Henry Daniel lir.

La Stephen Chbosky-i direct asüba taruba film 'Wonder' nung shilem agiba angutsü. Iba film ya R.J. Palacio-i züluba otsü kaket nung ajemdaker yangluba film ka lir.



MUMBAI, APRIL 20 : - Model Poonam Jhaver (noksa nung tabelen) aser Actress Saiyami Kher na Bodhbar aonung Mumbai nung Dadasaheb Phalke Excellence Awards 2017 sangdongba mapang tangokba noksa nung angur.

TAN HOPTA ATEMA - KOMA SÜLA ?

Q. Nagaland nung national aser state highways ya PWD-i masü private company - tem nem repringdaksü nunga koma süla?

Olong 20 shi nung April 21, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzöbatemji taruba Hokolbar nü adoktsütsü.

NE tsür Rashmi Uppal-i Mrs India Queen of Substance 2017 toktepba nung 2nd runner up angu



New Delhi, April 20 (Agencies): Mrs India Queen of Substance 2017 tetoktepba nung, Shillong nung soa intetla Rashmi Uppal-i Second Runners Up nguogo.

Rashmi-i la 'career' ya All India Radio nung tanur artist ka ama tenzük aser lai national jenjang nunga tetushi sempet aika agizükogo.

Rashmi ya tang Delhi nung alir. La tetenzük nungbo 'anchor' ka ama inyaka liasü aser lai 'beauty pageant' tem nung shilem agitsü asoshi kanga janrang.

Mrs India Queen of Substance konang akokba ya la pungmang atalokba ka lir. Rashmi college azüngba mapang nung Miss Fresher adoka liasü aser Miss North East tetoktepba nunga Second Runner sempet angu.

Rashmi-i la takok indang jembidang yamai ashi, "Ni All India Radio nung tanur artist ka ama shilem agia kü 'career' tenzük, iba sülen Anchor ama mapang talangka inyakogo, koba lokti balala nungbo tang tashi inyakdar. Ni 'Beauty Pageants' balala nunga shilem

agia aruogo aser College nung Miss Fresher aser Miss North East tetoktepba nung Second Runner-Up ngua liasü."

Rashmi-i model tem ajungketba nung aser 'charity' balala inyakba nung shilem agitsü asoshi nukjidong lir. Mrs India Queen of Substance 2017 tetoktepba ya New Delhi nung ITC Welcomhotel-i ayongzüka April 14 nü monga liasü aser iba tetoktepba nung Singapore nungi, Bhavana Bahl mezüing aser Haryana nungi Nidhi Jindal Gupta tanabuba jenjang angu.

Mastercard-i 'Fingerprint' amshiba card sayaogo


April 20, 2017 (Agencies): Alima ajunga nung 'credit card' agütsür asoshi Mastercard-i card tem nung fingerprint sensor keta yangluba 'new-age credit card' sayaogo

Osang ajanga ashiba agi, smartphone tem nung 'fingerprint sensor' inyakyim den kasa credit card-ia mapa inyaksü. Card amshirtemi osettsüset shishidang sensor nung parnok temeyong agi nemitsüla.

Iba card tasenba ya tang tashi nung South Africa nung anaben kanga takok ngua dandangogo.

Security Expert temi iba dak sendakba nung ashiba agi, iba ya digital payment atema teküzmükba tali agütsütsü asoshi jenjang tasen ka mesüra hack mesüdaksütsü asoshi lemanng ka asütsü.

Parnokisa ashiba agi, 'biometric identification' amshiba ya kanga dang tesangra mapa ka lir saka ano iba ajanga noklang nung



noklang teküzmükbabo magütsür.

Hacker temi tawa nüburtem indang data balala hack asütsü atema parnok indang noksa koba nung 'fingerprints' tem sayur, mesüra glass aser yamala mesükba osettem nung 'fingerprints' toktsübatem nung kanga tenük yokdar.

Kasa mapang nung 'fingerprint' aketba card tem ya tsüngtong oa shishilembaba nung amshirtemi saka online ajanga shishilembaba maparen atemabo iba ya yanglua mali.

WhatsApp nung tiazü post inoktsüba ajanga tepuokdaki ayitsü



Varanasi, April 20 (Agencies): WhatsApp aser Facebook nung tentetba telok nung ketdangser ka makümdang khen jungjunga bilemdangang. Kechiyong, item sapang nung osang tiazü prokshiba ajanga na tepuokdaki ayitsü.

Social media balala nung nisung kati telok tentettsü akoker aser iba telok nung züingsemtemi bilematem, noksa aser video balala lemsateptsü akoker.

Social media nung osang tiazü prokshiba, noksa yanglusa aser video nung pei jembiba oshitem inoka yanglur prokshiba ajanga nisungtem tsüngta aser kin o kin tsüngta mangatettep adokdaksür.

District Magistrate, Yogeshwar Ram Mishra aser Senior Superintendent of Police, Nitin Tiwari nati sangdong ka külemi agütsüba nung, social media telok balala nung osang tiazü prokshiba ajanga iba telok indang ketdangser (administrator) anema FIR benoktsü, ta metetdaksü.

"Social media nung telok aika 'news group' tenüing aser nüngja balala nung tenteta lir aser item telok nung osang tiazü aser mejangjaba osangtem prokshir," ta kasa sangdong nung shia lir.

Item ken o nung ajemdaker social media teloktem, WhatsApp aser Facebook nung ketdangsertem nem totuyuba agütsütar, ta kasa osang nung shia lir.

India nung WhatsApp

amshir nisung million 200 dak tali lir.

Social media nung telok tenteta aliba nung ketdangsertem parnok telok indang khuret aser kibur shilem agitsü asoshi totuyuba agüja lir.

Social media telok nung ketdangseri tejangja meteta aliba nisungtem dang parnok telok nung anioktsüla. Nisung kari item social media telok nung osang tiazü prokshiba ajanga tamangba yimsü nung ajemdaker mangatettep adokdaksütsüsa kümra pa/la ji iba telok nungi ketdangseri anidoktsüla, ta sangdong nungji shia lir.


"Iba amala osang tiazü prokshiba mapang telok nung ketdangseri kicha meinyakra, pa/la tai ta sayur aser parnok nem temerenshi agütsütsü," ta kasa totuyuba nung shia lir.

Iba amala osang prokshiba metetra police station anatiba nem osang agütsütsüla aser osang tiazü prokshir dak ozüing nung aliba ama merenshitsu, ta shisema lir.

Social media nung 'freedom of expression' ya tongtipang lir, saka teshisadangba alitsüla, ta Bodhbarnü agütsüba totuyuba nung shia lir.

Varanasi ya Ato Kelonser, Narendra Modi indang Lok Sabha constituency lir. Iba tesem nung aliba ketdangser dang, social media nung osangtsüsang prokshiba ajanga tamangba yimsü tsütsü mangatettep adokdaksütsüsa lira tapet temerenshi agütsütsü totuyuba agütsüogo.

Item arrla raksara cyber crime ozüing, Information Technology Act aser IPC temzüing kübok ken o benoktsü asoshi totuyuba agüja lir.



उ.पू.ह.ह.वि.नि.
NEHDC

North East tesemtem nungi teka mapa inyaker aser ola-angla amshia adakertem oset balala yanglutetbatem North East Handicrafts & Handlooms Dve. Corporeation Ltd, Bamunimaidan, Guwahati - 781021 (A Govt, of India Enterprise) dangi belena yoktsü aser NEHDC Ltd-i linük tesem balala nung 2017-18 küm tsüngta Exhibition, Craft Bazaar & Fair amala ayongzüka nung shilem aginürtem lira, 5th & 6th floor, East Point Tower, Bamunimaidan, Guwahati - 781021 nung aliba NEHDC Ltd indang Marketing Department den tongteprateptsü sangdonger. Item sentongtem tejangjaba nung metettsü asoshi Tel. No: 0361-2654830, M. No: 9435042627/9954026499/----- Fax No: 0361-2655934, Email Id: nehdcro@yahoo.co.in website www.nehdc.com ajanga tongteprateptsü metetdaksür.



New Delhi, April 20, 2017: Brihostibarnü New Delhi nung Chelyabinsk Region Angh, Boris Dubroveskly leniba nung Russia linük nungi teshimtet telok kati Minister of State for Commerce & Industry (Independent Charge), Nirmala Sitharaman ajurua senden amenba noksa nung angur.

Nitish aser Sonia nati linük yimtenren tensa indang jembia

New Delhi, April 20 (Agencies): Brihostibarnü Bihar Chief Minister aser JD(U) lenir, Nitish Kumar-i Congress Tir, Sonia Gandhi lar kidang ajurua tang linük yimtenren tensa indang onük lemtepogo, ta osang angazüker.

2015 küm BJP anema Bihar nung secular party tem loktepa ama loktepsü atema Kumar-i linük level nung secular party tem longjemtsü atema aiben jembia arur, aser maneni linük jenjang nunga Ato kilonser, Narendra Modi-i aniba BJP anema secular party tem longjemtsü atema pai Sonia Gandhi den jembio, ta osang angazüker.

Lenir anatisa tawa state pongu nung assembly election indanga süoka jembia aser

opposition party tem longjemtsü nungdak ta tena bangjema liasü.

BSP tongti, Mayawati-i BJP anema opposition party tem longjemtsü atema jembiba mapang ka nung JDU aser Congress lenir ana ajurua senden amener.

Uttar Pradesh assembly election matongdang Nitish Kumar-i SP, Congress, JD-U aser RJD longjemtsü atema inyaka liasü, saka pa tebilemba matalok.

Osang angazükba agi, Nitish-i opposition party tem longjemer 2019 General election nung tokteper aser pa Ato kilonser candidate süner.

Tanü senden nung JD(U)-isa Tir menden atema opposition longjemer candidate

shimtsü benok, aser iba atemaji Sonia Gandhi lenisüba nung inyaksü mepishi.

Ajisüaka otongdar, K C Tyagi-ibo, iba senden nung Tir election atemabo mejembia, ta ashi.

Paisa, "Constitution menden temaba atema opposition teloktep candidate ka alitsüla aser opposition party tuluba nungi lenir, Sonia Gandhi-i ibaji ketdangsütsüla," ta ashi.

Kumar-i iba atemaji Left party tem nungi lenirtem den jembio, aser parnok dang nungi telangzüba tajung nguogo, ta paisa ashi.

Tang Bihar nung Congress, JD-U aser RJD teloktep sorkar lir. 2015 küm assembly election nung party asem lokteper toktepa takok tulu ngua liasü.

Arunachal Pradesh state ya India shilem ka lir: Sorkar

Delhi, April 20 (Agencies): China-i Arunachal Pradesh nung tesem trok nem par nungja agütsüba aija India-i, tenüng agütsüba ajanga ozüng alema agiba litsüji par litsü makümer, ta ashi.

"Arunachal ya India shilem ka lir," ta Ministry of External Affairs otongdar, Gopal Baglay-i metetdaksü.

Yashi China-i Arunachal Pradesh nung tesem trok official süa tenüng jatsüogo, aser iba ya tim mera ka lir, ta sangdonga liasü.

Dalai Lama-i Arunachal Pradesh semdangtsü atema India-i pa nem temelaba

agütsüba atema China-i ashishiba mapang ka nung yashi parnoki iba osang sangdong.

Kasa onük nung Union information & broadcasting minister, M Venkaiah Naidu-ia, India nung yimtem nem tenüng tasen jaloktsütsü atema bendang linük shinga daka temeten mali, ta ashi.

"Arunachal Pradesh nung ali inch shiaji India meyong lir. Parnoki tenüng jatsünüra jatsüang. Iba ya ner kidanger tenüng melentsür ama lir. Ajisüaka tenüngji memelenshir," ta Union Minister-isa ashi.

China-i ashiba agi, Arunachal Pradesh ya South

Tibet shilem ka lir aser Buddhist den sentaktepa lir.

China nung official map nunga Arunachal ya South Tibet nung züngoka lir.

April 14 nü Ministry of Civil Affairs-i parnok indang websites nung, tesem trok nemji China, Tibet aser Roman alphabet nung ajemdaker tenüng agütsüogo, ta sangdong.

Tenüng trokji- Wo'gyainling, Mila Ri, Qoidêngarbo Ri, Mainquka, Bümo La aser Namkapub Ri lir.

Ajisüaka iba osang nungji China-i Arunachal Pradesh nung tesem trokjibo metetdakja mali.

VIP indang security majemtsütsü: Naidu

New Delhi, April 20 (Agencies): VIPs nem agüja aliba security ajema kümtsütsü atema sorkari tebilemba mali, ta Brihostibarnü Union Minister, M Venkaiah Naidu-i metetdaksü.

Centre sorkari May ita nungibo VIPs garitem nung beacon light temerem amshiba nokdangtsü atema sangdongba dak sentakba nung Naidu-i iba osang metetdaksü.

New Delhi nung osangbenertem den jembidang Information & Broadcasting Union Minister, Naidu-i, "Linük asoshi (lenirtem) security

nungdak, kechiyong tongtibang nisungtemji kümsütsü ayutsüla," ta ashi.

Centre-i VIPs sobaliba anentsü atema telemteba agiba dak sentakba nung Naidu-i, "Nisung ajakji VIP lir, aser ibaji sorkar tangatetba," ta ashi.

Paisa, state sorkartemia beacons nokdangtsü ta amanger, ajimesüra parnoki nüburtem terasaba ajürutsü, ta ashi.

Babri Masjid raksatsüba ken o dak sentakba nung tasüngdangba ka langzüdang pai, iba ken o ya küm aika kaa arur, anungji iba nungji tasen kecha mali, ta ashi.



Jakarta, April 20, 2017: Brihostibarnü Jakarta nung 'India Indonesia Energy Dialogue' senden nung Minister of State for Power, Coal, New & Renewable Energy and Mines (Independent Charge), Piyush Goyal-i Indonesia Energy & Mineral Resources Minister, Ignasius Jonan ajuruba noksa nung angur.

School tem nung Hindi oshi benokba anemer

New Delhi, April 20 (Agencies): CBSE aser Kendriya Vidyalaya school tem ajak nung Hindi oshi agitsü atema Tiri agizükba anema Hindi mejembiba state temi, Centre-i tanga oshitem nokdang, ta aitsü.

Trinamool Congress lenir, Saugata Roy-i, iba telemteba ya BJP-i par onük, 'Hindi, Hindu aser Hindustan' benoktsü nükjidong nung inyaker, ta aitsü.

"Hindi oshi mejembiba state tem nung iba telemteba mebenokdang Centre-i kanga shisadanga iba telemteba agitsüla asü," ta paisa ashi.

March 31, 2017 nü Tiri tetuyuba ka ajanga HRD ministry dang Hindi compulsory agitsü atema inyakang, ta metetdakja liasü.

Taküm February ita tashi nung linük nung CBSE school 18,546 liasü.

Babri Masjid ken o nung aitsüra Advani, Uma nung küm 5 tepoukdak ayutsü

New Delhi, April 20 (Agencies): Ayodhya nung Babri Masjid raksatsüba ken o nung L K Advani, M M Joshi aser Uma Bharti ama BJP nung tongti lenirtem aser kanga tongtibang nisungtem nem tai tonglokja lir, aser iba ken o nung parnok aitsüra parnok küm ana nungi küm pongu tashi tepoukdak ayutsü.

Supreme Court-i iba ken o asentenshia akatsü aser Indian Penal Code kübok- tamangba yimsü nung ajemdaker lokti balala tsükchitepdaksüba, tsükchitepsüsa o jembiba, lokti nung mepetmesü adokdaksütsüsa o jembiba

densema tanga onüktem nung ken o akatsü, aser aitsüra küm pongui tashi tepoukdak ayutsü.

Arishi küm 89, L K Advani, Joshi (83) aser Bharti (57) nung dak alia tangartemji Champat Rai Bansal, Satish Pradhan, Dharam Das, Mahant Nritya Gopal Das, Mahamadleshwar Jagdish Muni, Ram Bilas Vadanti, Vaikunth Lal Sharma aser Satish Chandra Nagar nung lir.

Babri Masjid raksatsüba nung tai tonglokja alirtem karbo süogo, aser asürtemji Bal Thackeray, Giriraj Kishore, Ashok Singhal aser Paramhans Ram Chandra Das nung lir.



New Delhi, April 20, 2017: Brihostibarnü New Delhi nung 11buba Civil Services Day anogomung sentong nung Minister of State for Development of North Eastern Region (I/C), Prime Minister's Office, Personnel, Public Grievances & Pensions, Atomic Energy and Space, Dr. Jitendra Singh-i photo exhibition semdangba noksa nung angur. Kasa noksa nung Cabinet Secretary, P.K. Sinha den tongtibang ketdangsertema kar angur.

TEPELA LEMSATEPER

ABA,

"IN ANOTHER HOME,
IN A HAPPIER PLACE
IN A BEAUTIFUL FOREVER,
WE WILL MEET AGAIN."

Onoki teti meima aliba asür Obala, **N.Madem Longchar, (Longkhum)**, pa mapang tatsüka shiranga aliba anogo nungitenzüka pa alima nungi pilar, onok mangyimba anogotem piyong Longkhum Baptist Arogo Pastori anir yimten, lokti tentet balala, ana aser talang nungi, kija kibong, kinungertem, ali tembartem, temeimertem mezüngtangteti arua nenok nübo, sarasadem aser senti rongsen, shisatsü agi onok yaria aruogo, ozü-i nenok temeim kodanga mamatsü. Nenok ajak dang iba zulu ajanga kanga dang pelarni ta ozü kibong aser kinungertem ajaki nenok dang pelaba lemsateper.

Ozüi kecha nenok nem meyiba magütsüteter saka asen Teyanglur Takar Tsüngremi na aser nür kibong, lokti tentet balala ajak moajang ta ozüi sarasademtsür.

**Temeim Kinungtsü, Chirnurtem,
Semchirtem aser Kinungertem.**

ASÜR N.MADEM LONGCHAR



ASO: 09.07.1949 - ASÜ: 19.03.2017

BILEMTETER



Imnaanok
(Waromung)
Died:
10/01/2008

Sajungkumla
(Waromung)
Died:
21/04/2010

Temeim oba aser oja akümli wadang tempanger kümsa aika süiaka nena temeim, shisa taka tongmelang tamang to kodanga mamar.

Nena ama arishir chirnür semchisemnur, yimer yimsanger rongnung adok dakjangma ta sarasadema nena menungraseta bilemteta mongtsür.

Temeim Kinungertem.

PROGRAMME FOR UNVEILING OF 1ST WORLD WAR NAGA LABOUR CORPS MEMORIAL MONOLITH

Date : 21st April, 2017
Time : 1:00 PM
Venue : Above Classic Island, Opposite Red Cross Building,
Officer's Hill, Kohima.

CHIEF GUEST

Dr. Shikharshie Lisaityn

Hon'ble Chief Minister of Nagaland.

CHAIRPERSON

Shri. Parraj Kumar, IAS.

Chief Secretary, Nagaland.

INVOCATION OF BLESSINGS : Rev. Kuzierang Thoü, State Chaplain.

Unveiling of the Monolith

SPECIAL NUMBER : Police Brass Band.
SHORT SPEECH : Shri. Y. Patton, Hon'ble Minister (Home)
SPECIAL NUMBER : Khedi Baptist Church
FOLK SONG : Cultureguard Mezoma
Address by Chief Guest
VOTE OF THANKS : Shri. Abhijit Sinha, IAS,
Home Commissioner.

Light Refreshment

Nagaland Police Service Association.

Issued by: DIPP

GOVERNMENT OF NAGALAND DIRECTORATE OF WOMEN RESOURCE DEVELOPMENT

NO.DWRD/TCPC/GEN-1/2007

Dated Kohima, the 18th April, 2017

ADVERTISEMENT

The Department of Women Resource Development invites applications from school dropout female candidates who are willing to undergo a ten-month training programme at the Training-cum-Production Centre (TCPC), Bayavü, Kohima in the trades of TAILORING, KNITTING, and WEAVING.

Eligibility

Edu. Qual : (a) Class VI Passed for Knitting & Weaving
(b) Class VIII Passed for Tailoring

Age : 18 to 35 years as on 1st Jan. 2017

Applications addressed to the Director, Women Resource Development, stating their Bio-Data along with 2 passport photographs, self-attested copies of relevant Mark Sheet and Birth Certificate are to be submitted to the Superintendent, TCPC, Bayavü latest by 27th April, 2017

Interview will be held on 29th April, 2017 at the Training-cum-Production Centre at 10:30 a.m. All intending candidates are directed to be present by 10:00 a.m.

The training programme is purely for promotion of self-employment and is not a certificate/diploma course.

Sd/-
Director

Office of the Yimjenkimong Senso Mongdang

B.P.O. Alongkima
District: Mokokchung, Nagaland

SENDEN AYONGER

28th April 2017 anogo mapang 09:00 AM nungi tenzüka emergency senso senden alitsü ayonger. Rongtak nüngdak ken-o lemteptsü ali nung, senso sanger süngpu nungi shir tema ajak iba senden nung arua adentsü metetdaksür.

Osangkaket nung sangdongba dak alaka official shidi unit shia dangi meyoker.

Sd/-
L. Longchaba Lemtur
President, Y.S.M

Sd/-
Imotiba Walling
General Secretary, Y.S.M

AKTD Presidential meeting jateper

Dimapur, April 20 (TYO) : Kaketshirtem asoshi nüngdak aika jembitsü alinung, Ao Kaketshir Telungjem Dimapur (AKTD) kübok Tir-tem senden ka 22 April, 2017 (Honibar) nikongdang 1:00 ako nungi AKTD Senyur kidang amentsü.

Anungji AKTD kübok Unit aser Sub-Unit ajunga nungi Tir-tem iba senden nung kata mezüdoki arua atentsü asoshi AKTD Metetbela zülur, Sp. Sentimeren Pongen-i sangdong ka ajanga metetdaksü.

Kaket Tasen

Meimchir süngmangdaksüba aser mangmangkoridaksüba rongnung Lipok kakat Tapu ka ya lir.

Iba tapu nungi Bible scholars balalai Research agiba den Science aser Geologis-temi bushitetbatem aika lir. Item rongnung Chinese Boxer aser Cultural Revolution tsüngda China nunger nüngtugo Arogo lenir kati züluba kakat Ao O nung meyipzüka lir.

Kija shiai ni kechiba aser kechi nukjidong nung yanglu telangzüba angutsü atema dang-ashi Arogo aser lokti nung benjaberi aser mangmangkori adoktsü atema masü.

Item bookstall- tem nung angutsü:

1. Christian Literature Centre Dimapur
 2. Eastern Bookstall near Mean Police Point. Mokokchung
- Kaket tenüng **ALIMA POKTETDAKTSÜBA MIIM O**
Kaket jenjang Rs. 130/-

GOVERNMENT OF NAGALAND DEPARTMENT OF POWER; OFFICE OF THE CHIEF ENGINEER Distribution & Revenue Nagaland : Kohima

No. CEL/MISC.INFORMATION/375-84

Dated : Kohima, the 3rd April 2017.

IMPORTANT INFORMATION

This is to inform esteemed consumers of the power department under Dimapur, Chumukedima and Kohima towns that the department will be launching SMS Gateway to alert / inform the consumers of the billing status. Hence the consumers of the aforementioned towns are hereby requested to provide their registered mobile numbers through -

i) Registration at web portal by log in to
www.dopn.gov.in

OR

ii) Send SMS their consumer ID from their registered mobile number to the following mobile number of the department **7005405146.**

(Er. K. YIESE)
Nodal Officer, RAPDRP Nagaland
Department of Power
Nagaland, Kohima.



Barcelona, Camp Nou, April 20 : Juventus telok pur Champions League semi-final tongtetba atema pelatepba noksa ka yangi angur.

Frolic Cup: Molvom Youth & Students' Union, KYC 'A', FC Zougham aser Sporting Club, Phaijijang teloktemi akok

Dimapur, April 20 (Agencies): 5buba Frolic Cup 2017 anogo asemububa asaya nung team 8 toktepa liasü. Iba asayamung nung Nagaland ajunga nungi asayar telok ajak agi 39-i shilem agidar. Anepdang asaya nung Molvom Youth & Students' Union-i 4-0 agi Frolic Jr. madak takok nuga liasü.

Ano tanabuba asaya nung KYC 'A'-i Lhangkichoi FC, Molvom, 1-0 agi akok.

Anügang asaya nung FC Zougham, Bokajan-i Sparkle United FC madak 2-1 agi takok angu aser iba sülen asayaba nung Sporting Club, Phaijijang-i 2-0 agi Alato FC, Pherima koka liasü

April 21 nü asaya yamai

alitsü:

1. Genesis FC, Medziphema Village, vs United FC, Medziphema 7:00AM.

2. Young Challengers FC, Medziphema, vs Starlit FC, Moava, 8:30 AM

3. Scampers United FC vs Tribal FC, Dimapur, 2:00PM

4. Leinghai FC vs Kickers FC, Chumukedima 3:30 PM

Tennis asayar mongin, Serena Williams mashisa kümogo

Michigan, April 20 (Agencies): "Tennis asayar mongin, Serena Williams ya mashisa kümogo aser 2017 küm lai asaya ka nunga shilem magitettsü," ta la indang odongtari Bodhbarnü sangdong ka ajanga metetdaksü.

Taruba hopta nung arishi küm 35 tain, Serena ya tanaben WTA jenjang mezüngbubai atutsü lir aser lai Snapchat nung "Hopta 20" ta zülur noksa ka

upload asü saka mapang talangka melii iba noksa lai indok.

Alima nung tetsür asayar rongnung sen timtiba alila, Serena Williams ya Reddit co-founder, Alexis Ohanian den 'engagement' agiba osang taoba küm December nung sangdonga liasü.

Williams ya mashisa küm hopta 20 junger süra, January nung Australian Open nung lai

Grand Slam otsü yanglushia 23 ben takok anguba mapang la mashisa küm ita ana-shi liasü.

Serena Williams-i teyi Venus Williams madak Australian Open nung takok anguba ajanga Serena aser Steffi Graf tsüngda Grand Slam akokba otsü kasasa aliba yanglushi.

Iba sülen la temokok yiruba ajanga tang tashi asaya kata nunga shilem agia mali.

PV Sindhu World No 3 kümogo

New Delhi, April 20 (Agencies): Brehostibarnü BWF ranking adoktsüba nung Rio Olympic nung silver medal angula PV Sindhu No. 3buba nung lir.

Taoba hopta la jenjang pungububa nung liasü, saka Singapore Open Super Series nung quarterfinals tonga asayaba

sülen lai iba jenjang tongtet.

Arishi küm 21tain asayar yagi tang tashi nung la career nung tajungtiba jenjang No. 2 tashi tongteta lir.

London Olympics bronze medallist Saina Nehwal-a jenjang ka temabai tua No. 8buba nung lir.

Teburtem kicha asaya

nung Singapore Open nung final asayar, runner-up Kidambi Srikanth aser takoker B Sai Praneeth na No. 21 aser 22 nung lir.

India nung tebur asayar rongnungi Ajay Jayaram tang tashi nung temaba jenjang nung lir. Pa jenjang ka temabai tua No. 13buba nung lir.

Ivory Coast nungi football asayar ana visa taila bener apu

Siliguri, April 20 (Agencies): Ivory Coast nungi football asayar ana visa taila bener lia West Bengal kübok Darjeeling district nung apu, ta Brihostibarnü police-i ashi.

"Arishi küm 23 tain, Mustafa Tonue aser arishi küm 19 tain, Mansoor Ibrahim naprong ya Ivory Coast nungi lir aser tena ya immigration ketdangsertemi Darjeeling district kübok Panitanki nung apu. Football asayar ana ya Nepal-i aoerba liasü," ta immigration ketdangser tejen kati ashi.

Africa nung lanur ana yagi 2015 küm nungi tena India nung aliba football club aika atema

football asayatsüogo ta ashir. Tena mezüng India nung tetsüng ajemokbaji 2015 küm Mumbai international airport atongba liasü, ta police-isa ashi.

"Tena indang visa 2016 küm expire asüba sülen, Kolkata nung alir nisung ka tenüng agi, Subrata ajanga tena indang visa mapang atsünglangtsü asoshi tezüluba agütsüogo ta tenatibo ashir. Ajisüaka kanga junga asadanga reprangdang dang tena meyong documents nungji ketdangsertem indang sign auya süa aliba putet," ta police ketdangser kati ashi.

Nisung ana ya Darjeeling district kübok Kharibari Police

Station nung inyaker ketdangsertemi apu aser Siliguri district court nem Brihostibarnü agütsü.

Police-i ashiba agi, iba ama ozüng alema inyakba putettsü asoshi bendanger ana dangji asüngdangya südar.

"Tena dang asüngdangyaba mapang tetsükdaksü aika adoker kechiba süra tenati English oshi junga mejembiteter. Küna ya ozüng alema inyakerteri ashiochtsü ta tenati ashi. Iba ama mapa inyaker aputsü asoshi bushisüngdang tenzükgogo, ta Kharibari Police Station nung Officer in-charge Samik Chatterjee-i ashi.



APRIL 21, 2017 ASAYA

Kolkata VS Gujarat - 8:00 PM

APRIL 20, 2017 ASAYA OSANG

Mumbai-i Punjab wickets 8 agi akok.

1buba Junior aser Sub junior asaya akatsü

Kohima, April 20 (TYO): asayamung DBHSS, CKHSS 1buba Kohima Village Junior aser Kohima Village nung aser Sub junior asayamung "nurturing the future" omen nung (Football aser Basketball) April ajemdaker amungtsü.

21 aser 22 nü, Kohima Village Asayamung nung shilem Students Union (KVSU) aser agitsüba teloktem yamai alitsü: Kohima Village Youth P.Khel Gladiators, L.Khel Organization (KVYO) nati Musketeers, D.Khel Samurai ayonga amungtsü. Iba aser T.Khel Warriors, ta alitsü.

Albert Ramos-Vinolas-i Murray tsükdaksü



Roquebrune-Cap-Martin (France), April 20 (Agencies): Brihosribarnü

Monte-Carlo Masters asayamung nung Brihosribarnü Spain nung Albert Ramos-Vinolas-i Britain nung, World No. 1 Andy Murray tebur kija asayaba, pre-quarterfinals nung tsükdaksüogo.

Ghonda ana ser minute 32 asayaba sülen World No 24, Ramos-Vinolas-i 2-6, 6-2, 7-5 agi Murray madak takok angu, ta osang ajanga ashi.

Arishi küm 29 tain, Murray

ya yirur aliba tawa ang tennis asaya tenzükg, anungji pai mezüngbuba set akokba sülen tanabuba set nungbo kanga mejungi tamakok angu aser tasembuba set-a makok ta asüba ajanga quarterfinal-i aitsü maongka magitet.

Quarter final asaya nung Ramos-Vinolas aser Croatia nung World No.8, Marin Cilic na asayatsü. Marin Cilic-i Czech Republic nung Tomas Berdych madak 6-2, 7-6 (7-0) agi koka quarter final jenjang tongtet.

EVERYONE FEELS THE PAIN!

Oajm
OINTMENT
FAST RELIEF FROM PAIN

A Product of LIVSAV Group
CUSTOMER CARE- 0250-6580183

BIEMDANGANG

"Nü tenüklang aser tekolak na jenjang shitak nung yuang"